

# TXIAKO

## Txiako Iokanatsopatakiti

---

**1** <sup>1</sup>Nota Txiako. Teoso nitiri nitxaua. Apiananiri Xesosi Kristo nitiri nitxaua apaka. Niökatsopatari ia aätsopa hitemoni, Xoteokori tosi nirimanetximoni Xesosi sãkire auiãkanimoni. Hite iarikape ikinika itixiti.

Ereëkai hite.

### Auiãkori Ataerekatiko

<sup>2</sup>Nitariakori, ikini sereti maerekati apokasaaki hitemoni, hienenikako, kotxi ikara ataerekatai hite. <sup>3</sup>Kotxi himarotari hãuiãkiti ataerekatikosaaki, hãtaparaxinireritika hãua. Himiteenekari imakinika himisiritiko hãpoxokoniritika. <sup>4</sup>Ininiã imakinika himiteenekasaaki, hãxinikakiti, hãsãkire, hãkamakiti pakini erekari. Kona apikomoni pinireka ereka pinini ìkapani.

<sup>5</sup>Himarore mauakanisaaki, hamanaãri Teoso imarore isikinii ìkapani. Ininiã isikaiko hite hamanaãkiti. Itori Teoso sikakiti ikinimanemoni. !Isãpaka ate ätipirika aamanainiri iua. !Itxitai. Isikapitikari hamanaãkiti. <sup>6</sup>Hamanaãkasaakiri, hãuikariko Teoso sikinii hamanaãkiti. !Erekari hãxinikiniri: “Atxiiti iua sikano namanaãkiti. Atxiiti kona isikano namanaãkiti.” Ikara atoko !hãxinikape. Ikara atoko xinikakari, tsakati potxoari uinitikiri atoko itxa. Ìtima anikari tsakati itano, eereka ixitika. Kãkiti ikara atoko inakari, äti öti auikari Teoso sãkire, äti öti kona auikari Teoso sãkire. Itxaãpota. <sup>7</sup>Kãkiti ikara atoko inakari kona xatiki apakapari Apiananiri siãkiti, <sup>8</sup>kotxi ipi ixinikakiti aua, ininiã apanakini !auikari isãkire ikamakiti tãkane.

### Matiiti, Katiiri Pakini Poxokoniuatini

<sup>9</sup>Pite aītari Teoso sākire auiākarii, atxiīti poiāori pitxaua, iuaritika pipoxokoniuatato, kotxi Teoso txīkitakai pite apiari pininiua.

<sup>10</sup>Pite katiirii, pipoxokoniuatato, kotxi Teoso kamapoiāotakai pite, kotxi katimari pixipokini aāui katimari xipokini atoko. <sup>11</sup>Atokatxi kanīkasaaki, kapatakari itxaua. Iuasaaki katsotati txiaroka. Iiui katxaka. !Erekaikaro. Iua atokokana kākiti katiiri xipokini. Paītiki ipinako, ininiā itakanapariko imakinika itii, iparīka pakini.

### Misirikaretxi Mīteenekakani

<sup>12</sup>Teoso takari erekari kākitimoni imisiritiko mīteenekakarimoni, Teoso sākire matakanaapakatimoni. Ikinipoko imīteenekasaaki, Teoso txīkitakari iua ātipirika auini Teosokata. Apiananiri sikaenetari ikara iua tirketanimoni.

<sup>13</sup>Pinirekasaakiri maerekati pikamini, kona pitxapiri: “Teoso sikanireōtano maerekati nikamini,” kotxi Teoso kamanireōtiko maerekati ikamini īkapani !auari. Apaka kona Teoso sikanireōtari kākiti maerekati ikamini īkapani. <sup>14</sup>Kākiti sikanireōtaāka maerekati ikamini, kotxi iua īto nireēkiti kosekari iua maerekati ikamini. Iuasaaki iteene inirekari inireēkiti ikamini. <sup>15</sup>Maerekati piīto nireēkiti pikamakasaaki, maerekati itxaua. Ininiā eereka maerekati pikamapika. Eereka iua maerekati txīkitakari pixinire ipinini.

<sup>16</sup>Nitariakori nota tirketakini, kona hāuiritapiri āti misirienetini. <sup>17</sup>Ikinipoko sikakori erekari atāo inakari, iaxitikiri itxaua. Aīri sikakiti ikara. Iuara kamari atokatxi, kasiri, iōriki pakini ponikini. Iua ātipirika kamari erekarinoka. Kita, uatxa, katana pakini, iua atokotxikana aīri Teoso. <sup>18</sup>Aponaniā iuaīkana aākixinireē, kotxi aāuikari iua sākire. Iua nirekari aponaniini ikara atoko. Teoso kamari ikinipoko. Ikamakini, merepanika iuaīkana ponaniākani, atxaua ate.

### Teoso Sākire Kīpitiko Pirena

<sup>19</sup>Ininiā nitariakori nota tirketakini, iteene himixinikariko āti sākire. Eereka iteene hīxinikariko hīkenakotakiti, hīsākirauatini apisapanika. Katima !hītxape hinaiatiniua. Hinaiatiniua apisa hīxinikariko hīkamakiti tīkane, <sup>20</sup>kotxi kākiti omanākarauatakasaaki, !ikamari atāo inakari Teoso paniātakiti iaōka. <sup>21</sup>Ininiā hōkariko ikinika maerekati hākixinire txikotakari. Hītakanapariko

ikinipoko maerekati. Hãuikariko Teoso sãkire hãkixinireẽ takakori. Himarotariko iuanoka makatxakiniri himaerekani.

<sup>22</sup>Teoso sãkire akenakotakanani atxa, !hĩtxape. Hĩkamariko isãkire iaõka apaka. Teoso sãkire kenakotakani makamakaniãri ipaniãtakiti, ninoaka misirienetaua. <sup>23</sup>Teoso sãkire kenakotakari makamakaniãri isãkire iaõka, kiki ãtakaãriã atamatoõtakari atoko itxa. <sup>24</sup>Iua itoõ atamataka atoko, isa. Iuasaakipeka imaxinĩkaretoõtapekua. Isanõka !ixinikaika. <sup>25</sup>Ikinika Teoso paniãtakiti erekari. Maerekati kamakani iaxirikakoni atoko. !Iposotarina erekari ikaminina. Ininiã kãkiti kamakasaakiri Teoso paniãtakiti, Teoso paniãtakiti sikakari kãkiti erekari ikamini ãkapani. Kãkiti iteene imarotiniãri Teoso paniãtakiti, imamaxinĩkaretakaniãri, ãtipirika ikaminiãri, ininiã Teoso takari erekari iuamoni, ikamakitimoni.

<sup>26</sup>Kãkiti sãpiretiniãri: “Nota auikari Teoso sãkire. Nikamari iua sãkire iaõka,” txamari kãkiti nini iauĩte atoko itxa. !Iposotari iotokakiniri maerekati isãpiretini. Iuaka misirienetaua. Iua auiãkiti na atão. Ikamakiti na atão apaka. <sup>27</sup>Kãkiti auiãkiti atão inakari auakasaaki, ikamakiti atão inakari auakasaaki, aãri Teoso apokaerekatari. Iua kãkiti kamari ia atoko: Itiretana imenõkariakori, tikinitakoni pakini, kotxi mauareni ninoa. !Auiritari ãkorapokoriti maerekati txikotiniri iua ãkixinire.

### Hĩpaxitana Ikini Kãkiti

**2** <sup>1</sup>Nitariakori, Xesosi Kristo aãuĩte Apiananiri itxaua. Iua sãkire atão auiãkani hininiãua, ininiã hĩpaxitariko ikinimane kãkiti. !Apakata hĩpotxitakininani hĩtoretini. <sup>2</sup>Maxinikariko. Atxiĩti hãpotiitakasaakia, kiki apoka eremãkari. Iuakokiã aneo oro kamakoro aua. Apaka iusaaki apoka ãti kiki matiiti. Kitxakari imãka. <sup>3</sup>!Apakata hĩpaxitiniri eremãkarinoka. Hĩsãpiretiniãri: “Uai iitopanatxi ereri nopini piitopãka,” pitxari. Txamari hĩsãpiretari matiiti: “Ikiraã pitima.” Atxiĩti hĩsãpiretari iua: “Uai ixiti nikitaki takote piitopãka,” pitxari. Ikara atoko hĩkaminiã, !apakata. <sup>4</sup>Ikara atoko hĩkamakasaaki, hĩxinikari katiiri apiaerekatini, matiiti poião ereka inini. Iusaaki hĩxiniãkiti na atão itxaua. Hãkixinire maerekati itxaua.

<sup>5</sup>Nitariakori nota tirketakini, hĩkenakotariko nisãkire. Teoso mereẽpekari matiini ãkorapokoriti auakani isãkire iteene auikinina ãkapani. Ininiã ninoa Teoso tirketakani sariko Teoso auĩtetxi ininiãtaãua. Ikara isikaenetapeka iua tirketanimoni. <sup>6</sup>Txamari

hĩte kona paxitana matiini. !Apakata. Katiirinira misirienetai hĩte. Ninoa anikai hĩte kākiti misiritiko mereēkanimoni. <sup>7</sup>Ninoa katiirini misākirepiretari Teoso. Peerekari iua uāka, iuaritika ninoa kona paxitari iuāka. Ninoa misākirepiretakiti nakitiakori hĩtxaua hĩte.

<sup>8</sup>Kitxakapirĩka Teoso sākire iōkatsopatakori txari:

Piteka pitiretiniua atokokanera, pitiretanako pite takote auakani. Ikara ikinimane auĩte paniātakiti hĩkaminiā, hĩkamari atāo inakari. <sup>9</sup>Hĩtiretiniāri hĩpotxitakininani, maerekati hĩkama. Ikara Teoso paniātakiti oerekai maerekati kamakani hininiāua. <sup>10</sup>Ikinika Teoso paniātakiti hĩkaminiā, txamari ātinoka Teoso paniātakiti himakamakaniā, ininiā ikinika ipaniātakiti makamakani atoko hĩtxaua. <sup>11</sup>Teoso txari:

Kona pisirĩkape pĩtanoro minakotokatika.

Apaka itxari:

Kona pokaniuatape.

Atxiĩti kona pisirĩka pĩtanoro minakotokatika, txamari pokaniuata, ininiākara !pikamari ikinika Teoso paniātakiti. Ātika Teoso paniātakiti pimakamakaniā, !apakata. Ikara atoko ininiā, Teosomoni maerekati kamakari pitxaua.

<sup>12</sup>Teoso sākire iaōka akaminiā, aposotari erekari akamini. Ōpoĩkakoni atoko atxaua. Maerekati !imaĩkaikaua. Ininiākara atāo hĩsākirauatako. Atāo inakari hĩkamako, kotxi Teoso kamariko hĩtemoni isākire iaōka. <sup>13</sup>Himaamonĩkakaniāri āti, Teoso kona amonĩkai hĩte. Imereēri himisiritiko. Apiaerekata hiamonĩkiniri āti, maerekati ikamakasaaki. Poiāo erekari himisiritiniri iua imaerekani xika.

### **Kākiti Sākire, Kākiti Kamakiti Pakini Pirena**

<sup>14</sup>Nitariakori, kākiti txari: “Nota Teoso sākire auiākari nitxaua,” itxamari, likamari Teoso nirekaākiti. Atauako iua auikari Teoso sākire? Atauako, iua sākire posotari imaktxakiniri imaerekani Teosomoni isini ikapani? Konapitini. <sup>15</sup>Atxiĩti hĩtari, atxiĩti hĩtaro Teoso sākire auiākani imākana !uari. Atxiĩti nipokori !uari ninoamoni. <sup>16</sup>Iuasaaki atxiĩti hĩtxana: “Hĩsipiniikaua, erekaxinire hinini. Kamākaiko. Iteene hinikako,” hĩtxana atxiĩti. Txamari iuasaaki mākatxi !hĩsikana, nipokori !hĩsikana. Ikara atoko hĩkaminiā, !apakata hĩkamakiti. Hĩsākirenanira hĩsikiniā, ininiā maxikatiĩka hĩsāpiretakiti. <sup>17</sup>Atxiĩti ikara atoko atxa. Asāpiretari aũuikiniri Xesosi sākire. Txamari kona akamari ipaniātakiti. Ikara

atoko aniniã, asãkire kona itxa. Aãuiãkiti sãkiretxiti ipinakari atoko itxa. !Kakamareri iua.

<sup>18</sup>Kãkiti atxiiti txari: “Pite aukari Teoso sãkire. Nota parĩkauata Teoso ïkapani.” Puposotari atxiiti poerekinino pauĩakiti, Teoso paniãtakiti pimakamakanisaaki? Kona piposota, kotxi atão pauĩakiti lauari. Notapekana, nota posotari noerekiniri nisãkire nauĩakiti nikamakitiã Teoso paniãtakiti nikamakasaaki. Ikara atoko nininiã, kãkiti imarotapitikari atão nauikiniri Xesosi sãkire. <sup>19</sup>Pite aukari ãtinani Teoso auini. Ininiã erekapitikari pauikakiti. Txamari ikara ãmakatxakari pimaerekani Teosomoni pisini ïkapani, kotxi Satanasi nitiriakori apaka aukari ãtinani Teoso auini. Iua xika ninoa titinanaka ipĩkarauatiniãna. Ninoa imarotari ãti õti ixipokinina.

<sup>20</sup>!Kiĩkitei pite. Pinirekatari noerekinii !apakata pisãkireẽ pauikiniri Xesosi sãkire, iua paniãtakiti iaõka pimakamakanisaaki. Iuasaaki pisãkire na atão. Ipĩkari atoko itxa. <sup>21</sup>Maxinikariko ate apika atokirini, Apraõo. Kitxakapirĩka isikasaakiri amarite Isaki inakori Teosomoni sikakori takikoãtaã, iuasaaki Teoso apokaerekatari ikamakiti, kotxi ikamakiti oerekari Teoso, iua auikiniri isãkire, ininiã Teoso kamaerekatari iua. <sup>22</sup>Ininiã himarotari atão iua auikiniri Teoso sãkire. Ikamakiti oerekari isãkire atão inini. Hĩxinikari iua. Atão ikamari Teoso paniãtakiti, ininiã atão iua aukari Teoso sãkire. <sup>23</sup>Ininiã Teoso sãkire iõkatsopatakori apokapeka. Itxari:

Apraõo aukari Teoso sãkire, ininiã Teoso txĩkitakari iua atão inakari ikamini, Teoso apakapiniri ïkapani. Ininiã iua akiritaãka Teoso moianari. <sup>24</sup>Ininiãkara ia himarota. Teoso kamaerekatari kãkiti ãkixinire isãkire iaõka ikamakasaaki. Kona Teoso kamaerekatari kãkiti ãkixinire, isãkirenoka auakasaaki. Inirekari atamatiniri kãkiti parĩka apaka.

<sup>25</sup>Ãto atão Teoso sãkire auĩãkaro nisãpiretai hĩte. Kitxakapirĩka kanokarero Haapi inakoro aua. Teoso kamaerekatari oa ãkixinire, kotxi oa apakapana Xosoe iokanatakini otixine apokasaakina. Oaãpoko okipatana ninoa. Iuasaaki oa oerekana ãti kimaporiti imitekinina ïkapani.

<sup>26</sup>Kãkiti ãtoã ixinire mauakanisaaki, iua ipĩpe. Iua !kakamareri. Ininiã iua atokokana iua sãkire iua auĩãkiti ipinakari atoko, erekari imakamakanisaaki. Iua auĩãkitinani, isãkirenani, !imakatxakari imaerekani.

### Kākiti Nini Pirena

**3** <sup>1</sup>Nitariakori, !apakata itori hīte Teoso sākire oerekakani hininiua, kotxi ate Teoso sākire oerekakani maerekati akamakasaaki, apiata Teoso misiritaua ate. <sup>2</sup>Amakinika ate kerokapanikari. Kākiti makerokakaniāri isākire, ininiā erekari iua. !Auiritari iīto kaminiri maerekati.

<sup>3</sup>Anirekasaakiri kavaro kīpitiniri anireēkiti, atakari inamaā metaoke ipiriāketakari. Ininiā iuasaaki ikamariko anireēkiti. Ia metaoke axapitikeri, iuaritika aposotari akakiriokiniri kavaro, ininiā isari anirekinimoni.

<sup>4</sup>Apaka hīxinikaroko maporo. Maporo mitaro. Ītima kataparari anikaro. Maporo oerekakire axapitiki, iuaritika kākiti kakiriokaro maporo oerekakireē, ininiā maporo sari kākiti nirekinimoni.

<sup>5</sup>Iua atokokana, aītoā auakari anini apaka axapitiki, iuaritika iposotari iteene maerekati ikamini. Hīxinikariko. Xaminaminiki axapitiki, iuaritika iposotari iotikiniri itori kikio. <sup>6</sup>Iua atokokana ninitxi. Xamina tirinakari atoko itxa, ininiā kona erekari. Maerekati ninitxi sāpiretakiti. Iarika kākiti xinireē ikinika, xamina ĩtopa iarikini atoko. Ininiā iua maerekatinoka itxa, ininiā ikinipoko ikamakiti maerekatinoka. Maerekani misiritikoātaā ĩkari itxa asākire maerekati. Xamina tirinakari iuaātaākiri atoko itxa asākire maerekati.

<sup>7</sup>Kākiti piratari ikini sereti kaxipiri ĩtopakiri, kotipiriki, imini, iaā auakari pakini. Itori kākiti piratapeka. <sup>8</sup>Txamari ninitxi paneenamari. Kākiti !iposotari imīkapiritiniri inini. Kona ikamari anireēkiti. Imini katsiiri atoko itxa. Imini tsii posotari okiniri kākiti. Iua atokokana, kākiti sāpiretakiti posotari okiniri kākiti.

<sup>9</sup>Anini posotari isāpiretiniri erekari aīri aāuitemoni. Apaka iposotari maerekati isāpiretini kākitimoni. Īkora atoko !erekari, kotxi Teoso kamari kākiti iuaka atoko inakari ĩkapani. <sup>10</sup>Anamaā potorika erekari, maerekati pakini. Nitariakori, ia koketakori na atāo. !Apakata. <sup>11</sup>Amomo !oposotari āparaā ponikoāri, posiāri pakini otxīkitakini. <sup>12</sup>Nitariakori, atauako māka mina iritari iōpeta? Atauako iōpeta mina iritari māka? Konapitini. Apaka amomo āparaā ponikoāri !auari āparaā maxiāri pakini. Iua atokokana kākiti sākire. !Apakata kākiti āti ōti isākire ereka inini, āti ōti isākire maerekati inini.

### Imaroretxi Pirena

<sup>13</sup>Kiripa kimaroreri hīte sauaki auakari? Kākiti atāo kimaroreri inakari, oerekari imarore ikamakiti erekari ikamakasaaki. Erekari ikamakasaaki, !uikaua, kotxi atāo imaroretxi auiniā kākitemoni, !auritari iua iuikiniua. <sup>14</sup>Txamari pinīkatiniāri xikoretxi papixiri pākixinireē, piteka nireēkitinani pinirekiniā pākixinireē, kona pitxape: “Kimaroreno nota.” Iuasaaki kona pikipatapiri atāo inakari. <sup>15</sup>Īkora pimarore !iaxitikirini. Īkorapokoritikirinokara ikara pimarore. Ikara pimarore piīto nireēkitikara. Imaroretxi ikara atoko inakari Satanasi oerekakiti. <sup>16</sup>Xikoretxi auakasaaki, piteka nireēkitinani pinirekini auakasaaki, ikara atoko inakasaaki, neenamatzinoka aua, ikini sereti maerekati aua apaka.

<sup>17</sup>Imaroretxi iaxiti ĩkari kona ikara atokoni itxa. Iua imaroretxi imarotakari, erekarinoka ikama. !Nirekari neenamatzxi. Merepitipanika ixinikari apanakini kākiti nireēkiti. Apiananiri nireēkiti ikama. Iamonīkari āti. Erekarinoka ikama ātitemoni. Apiarimoni isākire atokotxikana isākire poiāorimoni. Ikamakiti isākire iaōka itxa. <sup>18</sup>Kauaīreri otākikari apanakini imaneenamauatakani, ininiākara itori kākiti kamari atāo inakarinoka.

### Īkorapokoriti Auakani Nireēkiti !Hinirekape

**4** <sup>1</sup>Neenamatzxi auakasaaki hītemoni, hītxitakakasaakiua, nāpa ikara atoko inakari potorika? Hākixinireē ipotorika neenamatzxi. Hinireēkiti maerekati xika hineenamauata. <sup>2</sup>Hinireēkiti kona hāpakapa, ininiā hōkari āti. Iteene hinirekari āti nakiti, txamari !hāpakapari hinireēkiti. Hītxitakakaua. Hineenamauata. Txamari kona hāpakapari hinireēkiti. Kona hamanaāri Teoso hinireēkiti hāpakapini ĩkapani. Ikara xika kona hāpakapari hinireēkiti. <sup>3</sup>Atxiiti Teoso hamanaākasaaki, kona hāpakapari hinirekakiti, kotxi hamanaākasaaki, maerekati hīxinikapnika. Hinirekari hāpakapiniri hamanaākiti hītenani ĩkapani, hītenoka poxokoniuatini ĩkapani. Ikara xika Teoso lisikai hinireēkiti.

<sup>4</sup>Kanokarero, kanokareri pakini atoko hīttxaua. Hīte takanapari Teoso, ĩkorapokoriti auakaninoka hītiretini ĩkapani. Hītiretiniāri ĩkorapokoritinoka, iuasaaki homanatarari Teoso. Hinirekiniāri ĩkorapokoriti auakani nireēkiti, ininiā Teoso mokaiakari hīttxaua. <sup>5</sup>Kona maxikatiīka Teoso sākire iōkatsopatakori sāpiretaua ia atoko inakari:

Erekari Matamatakoti aākixinireẽ auakari nirekari iteene  
anirekiniri Teoso turetiniua. Iua linirekari anirekiniri  
ïkorapokoriti auakaninoka turetiniua.

<sup>6</sup>Teoso sikari iteene erekari atemoni, kotxi Teoso sākire  
iōkatsopatakori txari:

Teoso !apokaerekatari kākiti iuikakaniua. !Imoianatana ninoa.  
Kākiti miuikakaniua, ikinipoko erekari isika ninoamoni.

<sup>7</sup>Ininiã hāuiritariko Teoso hāuĩte ininiua. Iua nireēkitinoka  
hĩkamako. Kona hĩkamapiri Satanasi nireēkiti. Kona hĩkĩpitapiri iua  
sākire, ininiã eereka iua miteka. <sup>8</sup>Teosomoni hāpokako, ininiã iua apoka  
hĩtemoni. Maerekati kamakani hininiãua, hĩtakanapariko himaerekani.  
Kona hāuiritapiri hĩuako kaminiri maerekati. Hĩtepekana, hĩte sākire  
ipinimoni itxa. Hākixinire xinikakiti ipinimoni itxa. Ininiākara  
hĩokanatariko maerekati hākixinire auakari, erekarinoka kaikotini  
ïkapani. <sup>9</sup>Himatinaniuatako, hĩtxiapatako iteene, maerekati hĩkamakiti  
xika. Hĩtakanapariko hĩsiroatini hĩtxiapatini ïkapani. Hĩtakanapariko  
hĩpoxokoniuatini himatinaniuatini ïkapani. Ikara atoko hĩkamako,  
maerekati hĩkamakiti xika. <sup>10</sup>Apiananirimoni hĩtxariko: “Nimaerekani  
xika !erekano nota. Minakati nitxaua. !Niposotari erekari nikamini.  
Piamonĩkano,” hĩtxariko Teoso. Eereka iua sikataparaxiniretai hĩte.

### **!Himisākirepiretapiri Hĩtari**

<sup>11</sup>Nitariakori, !himisākirepiretakakapeua. Āti misākirepiretiniãri  
ãti, kona ipaxitari Teoso paniãtakiti. Āti akiritiniãri ãti: “Maerekati  
kamakarii,” akiritari Teoso paniãtakiti: “maerekati.” Ikara atoko  
inakasaaki, iuamoni iuaka sākire apiata, ininiã iua !ikamari Teoso  
paniãtakiti iaõka. <sup>12</sup>Teosonokara atão inakari imarotakari aua. Iuanoka  
posotari isãpiretiniri kākiti: “Pite kamakiti kona erekari. Pitepekana  
kamakiti erekari.” Iuanoka posotari ikara atoko ininii, kotxi iuanoka  
posotari kākiti maerekani imaktxakini. Iuanoka posotari iokanatiniri  
kākiti imisiritikomoni. !Apakata ikara atoko hĩte ininiri apanakini.

### **Katana Kamaenetakori**

<sup>13</sup>Atxiĩti hĩte txari: “Atxiĩti uatxa, atxiĩti katana asa sitatximoni.  
Anapariko ãtikanani iuaãtaã. Aparĩkauata itomane txineiro aãpakapini  
ïkapani,” hĩtxama. <sup>14</sup>Txamari kona himarotari katana auakari tĩkane.  
Kanatokopa itxa kākiti? Ianiĩ atoko itxa kākiti. Ianiĩ apoka, eereka  
patimari ixipokini. Ikara atoko kākiti auini. <sup>15</sup>Apiaerekata hĩsākire ia



atoko hinini: “Teoso nirekiniāri, nauapanika ninakasaaki, nikamariko ikara parīkatxi,” hīt̄xako. <sup>16</sup>Ikara atoko himasākirauatakaniā, hīuikaua, kotxi hīuikari hīkamakiti tīkane. Maerekati ikara atoko inakari. <sup>17</sup>Ininiā erepaniko. Kākiti erekari imarotakani makamakaniāri ikara erekari imarotakiti, ikamari maerekati.

### Katiiri Pirena

**5** <sup>1</sup>Hīkenakotariko nisākire. Ikinika katiirini kapotxinanirini hīkenakotariko nisākire. Hīt̄xiapatako. Hākiriपोatako, kotxi itori hātatsiire apokako hītemoni. <sup>2</sup>Hīt̄ii paiakapeka. Kapite nikapekari himāka. <sup>3</sup>Hinakiti oro kamakori, pirata kamakori pakini oereēkatapeka. Ikara oerekari hīkamakiti !apakata. Hīt̄ii xipokini atoko, hīte apaka xipokako. Apiata himisiritiko. Maxikatīka hāpotiitari hīt̄ii, kotxi itixi xipokini ōti apokanapanoka. <sup>4</sup>Himarotariko ia. Kākiti hīte kikioteē parīkauatakasaaki, himisirienetana ninoa. Na atāo hīikitxitana iparīkana īki. Ininiā ninoa akiritari Teoso. Iusaaki Apiananiri kaposotiireri kenakotari ninoa sākire. <sup>5</sup>Īkorapokoriti hāuakasaaki, ikinipoko auā hītemoni. Hiamotari ikinika hīto potxitakiti. Kākiti sikari kema auīte ito kienatxi, okiko ōti manapi paīperi inini īkapani. <sup>6</sup>Hīte iokanatapekari kākiti erekarini ipininimoni. Hōkapekana ninoa maxikatīka. Ninoani kona naiatai hīte, iuaritika hōkana ninoani.

### Apiananiri Kanapiriini Hiātapini

<sup>7</sup>Nitariakori, atxiīti hītemoni !katimari Apiananiri kanapiriini, iuaritika hiātapariko hīpoxokoniritika, kotxi himarotapitikari āti ōti iua kanapiriini. Hīxinikariko katakareri. Iua iātapapikari itakare aneini, ikiena iposope inikini īkapani. Iātapari āparaā kipini itakare aneini īkapani. Iua imarotapitikari ikiena aneini, ininiā iātapari. <sup>8</sup>Iua atokokana hiātapariko Apiananiri kanapiriini. Hītaparaxinireritika hiātapari, kotxi Xesosi kaiamapeka ikanapiriini. <sup>9</sup>Nitariakori, kona hīt̄xitakakapeua. Hīt̄xitakakiniāua, hāpakapariko himisiritiko. Kākiti misiritiko mereēkari kaiamapeka apokini hītemoni.

<sup>10</sup>Nitariakori, hīxinikariko Teoso sākire sāpiretakani, kitxakapirīka auakani, sāpiretari Teoso sākire Teoso posotiireē. Ninoa misiritaāka, iuaritika ninoa mīteenekari imakinika. Ninoa oerekaua amīteenekiniri imakinika. <sup>11</sup>Ari, aimarotari Teoso takari erekari misirikaretxi mīteeneēkanimoni. Hīxinikari Xo inakori. Iua iteene atatsiirauata,

iuaritika, !itakanapari Teoso. Atatsiirauataka atoko, Apiananiri sikari ikini sereti erekari iuamoni, kotxi katiraōkiri, kaamonīkareri itxaua iua.

<sup>12</sup>Nitariakori, “Ari,” hinakasaaki, “Kona,” hinakasaaki, kona maxikatiika hīsākirauatape. Hīkamariko hīsāpiretakiti iaōka. Hīkamaenetakiti hīsāpiretakasaaki, kona hākiritapiri Teoso tixine auakani uāka, kona hākiritapiri itixi auakani uāka, hīsāpiretakiti apanakini atāo imarotini īkapani. Na atāo hīsākire ininiā, Teoso misiritapitikai.

### Teoso Misākiretiko Kākiti Īkapani

<sup>13</sup>Hātatsiirauatakasaaki, himisākiretariko Teoso. Hīpoxokiniuatakasaaki, hīxikarauata Teoso īkapani. <sup>14</sup>Āti amianatakasaaki, hīpīkapiretanako kōtākikarerini Xesosi sākire auiākani Teoso imisākiretinina amianatakari īkapani. Iuasaaki itakarina iītxi iua amianatakari nopini Apiananiri uākaā. <sup>15</sup>Hāuikiniāri Teoso posotiire himisākiretakasaakiri Teoso, iua makananitapitikari iua amianatakari. Ininiā Apiananiri ōkitikariko iua. Maerekati ikaminiā, Teoso makatxakari imaerekani apaka. <sup>16</sup>Ininiā hīkerokakiti hīsāpiretakakauako. Himisākiretariko Teoso āti īkapani. Ininiā apanakini misākiretariko Teoso hīte īkapani. Iua atokokana, Teoso txīkitakari hākixinire ereka inini. Atāo inakarinoka kamakari sākire kataparari, Teosokata isākirauatakasaaki, kotxi Teoso kamapitikari iua amanaākiti iaōka.

<sup>17</sup>Kitxakapirīka Eríasi inakori, ate atoko inakari iua. Iua misākiretari Teoso itapararitika āparaā makipakani īkapani. Ikara atoko inakasaaki, āparaā likipa ipi āti pakini anokanani, seisi kasiriti. <sup>18</sup>Iuaīkana imisākiretari Teoso āparaā iuaīkana ikipini īkapani. Ininiā āparaā kipa. Iuaīkana itixi iriuata.

<sup>19</sup>Nitariakori, āti takanapiniāri atāo inakari Teoso sākire, hōtākikariko iua Teosomoni ikanapiriini īkapani. <sup>20</sup>Maerekati kamakari takanapiniāri imaerekani, iua pōtākikasaaki, ininiā pite makatxakapekari iua ipinini. Teoso makatxakari ikinipoko maerekati ikamakiti.